

Minister Otmar Oduber ta reacciona ariba comunicado:

EcoGas no por uza gobierno como cabay pa gana placa den su negoshi

ORANJESTAD (AAN) – Minister di Infraestructura, Medio Ambiente y Desaroyo Teritorial, sr. Otmar Oduber, den rueda prensa gubernamental di Dialuna, a reaccion ariba un comunicado di prensa emiti pa EcoGas.

E mandatario a referi na un carta cu gobierno a manda na September 2018 caba, dirigi na AHATA, mirando cu su clientenan comercial mas grandi ta e hotelnan estableci na Aruba.

E tempo ey enberdad tabata wordo pretendiendo comosifuera cu gobierno a aumenta su “tipping fee” y ta pesey nan a triplica e prijs.

Minister Otmar Oduber a expresa cu hecho ta cu Eco Gas den e caso aki, como compania cu ta cay bao Ecotech, a triplica prijs, e tempo ey, na nan clientenan.

E mandatario a splica cu contrario na loke a wordo treci dilanti pa Eco Gas, comosifuera cu Gobierno y su persona loke a negocia pa aumente “tipping fee”, aña pasa nan a bisa cu mester di

un fase transitorio pa yega na e solucion definitivo, pasobra no por sigui tira sushi na Parkietenbos y no tin forma pa deshaci di e desperdicionan, nan ta bay sinta cu un compania local cu tabata por separa un parti di e sushi y e resto hinke den saconan di plastic, pa yega na un acuerdo y na un forma ordena y conforme codigonan internacional, dera nan den e caso aki den Seroe Tjishi.

E mandatario a señala cu e tempo ey pa por a yega na un prijs pa e contrato entre gobierno y Eco Gas, ambos hunto a busca un auditoria di un compania di accounting, cu mester a drenta y fiha e prijs pa por dera e sushi y wak cuanto esey ta costa di parti di Serlimar y cuanto ta costa Serlimar hinca e sushi den “envirobales”, pa despues wordo dera.

Ningun momento tabata tin negociacion di “tipping fee”.

E mandatario a acentua cu e kier trece claridad den esaki, duidelijk, y e ta lamenta cu un compania cu


e ta considera asina serio manera Eco Gas, por purba desinforma comunidad comosifuera “tipping fee” a wordo negocia.

Den e contrato ta papia di un servicio na gobierno pa hiba e sushi cu nan ta recoge na casnan, trece nan bek pa Serlimar dera esakinan.

E mandatario a agrega cu di otro banda a sali na cla cu ta costa 60 florin pa dera e sushi aki na un forma responsable, cu tubo di gas, etc., pa keda den cuadro di normanan internacional di medio ambiente.

Gobierno na su turno a bisa cu mirando cu ya caba na Parkietenbos, awendia y pa mas cu 20 aña caba e tipping ta 60 florin e ta mantene igual na Seroe Tjishi. Gobierno ni un minuut a subi e ni cu un cen.

Segun e mandatario, contrario na esaki Eco Gas a dicidi, apesar cu e tabata dunando servicio caba y di ta un empresa cu ta brinda na casi 90% di e parti comercial di nos Isla, y cu nan tabata duna na e prijs



cu segun e tabata esun cu nan mester a cobra, a subi e tipping fee na su clientenan.

Na momento cu gobierno y e compania a yega na un acuerdo, aña pasa, y a puntra cuanto ta cobra gobierno pa procesa e sushi, Eco Gas a dicidi sin mas pa aumenta e prijs na 120 fls riba su clientenan. Esaki ta un deal entre e compania y su clientenan, y eynan e triplificacion a bin. E mandatario a subraya cu den e informacion cu Eco

Gas a purba transmiti nos comunidad y su clientenan tambe, e no por uza gobierno como un cabay pa e gana placa cune den su negoshi.

Via algun potret muestra den pantaya grandi Minister Otmar Oduber a muestra kico tin patras di e edificio di Eco Gas, cu ta un dump riba su mes completamente ilegal y un bista masha mahos mes, unda nan mes ta tira cierto desperdicionan.